

a Mukrow — wšě 4 małe wjeski po wokoło 200 wobydlerjach — a nowiša fabrikska kolonija Heinrichsfeld. Poslědniša wjes je nimalo cyle němska; prajachu drje mi, zo tam tež někotři Serbja mjezy bydla, ale njebudže jich to wjele. Runje tak je Słomjeń wjetšu połojcu němski resp. přeněmčeny přez wjele němskich džělačerjow, kiž su so tam zasydlili a prjedy mału holansku wjes tak powjetšili. Po jara wěrliwej powěsći je w Słomjenju na 700 němskich a zněmčenych wobydleri, kotřiž móža stari a młodži jenož němski; k tomu móžetej a rěcitej zwjetša dwě třećinje němski; w šuli je wučba jenož němska. W Dubrawje je, štož tón samy swědk wobkruća, 20 Němcow, kotřiž kaž tež jich džěći jenož němski rozumja. Serbske swójby drje trochu němski rozumja, tola ze swojimi so jenož serbski „rozgranjaju“. W Kochanojcach a Chojanach su stare burske a khěžkańske swójby serbske, je pak tam tež něsto němskich džělačeri přičahło. W Mukrowje je 5 Němcow; Wjaska a Železna staj do čista serbskej. Wučeř Lehmann w Železnej je drje rodženy Serb, wuči pak němski, jenož z „tymi małkimi, kenž do ceła němski njerozměju, tek třošku serski pójeda“. — Mukrow je do Železneje zašulowany.

Serbja khodža wokoło Grodka wšitcy w serbskej drasće: žónske maju swój wosebity Grodkowski - Mužakowski nastroj. Spomnić tu jenož chcu, zo so w Železnej młode holcy a žony přez to wuznamjenjuja, zo maju wone skoro wšě čerwjene rubišćo, wjetši džěl cyle jenajkeho mustra, nad štałtom.

#### XXXIV. Lěšćańska wosada.

Lěšćańska wosada wobsahuje tři wsy: cyrkwinsku wjes Lěše abo Lěšći (Horno) z 530 wob., němskich swójbow 10 (džělačerjo w brunicowych podkopkach a korčmarjo); Bóšojce (Bohsdorf) z 330—50 wob., němskich swójbow 10 (piwarec a džělačerjo w brun. podkop.); Zakrejc (Wadelsdorf) z 200—225 wob., němske 3 swójby (inspektor, młynk, kołodžej) z 11 wosobami, po druhim swědčenju jeničcy młynkec swójba. — Serbja tuteje wosady rěča domach a wonkach serbski, mjez sobu a z džěćimi. Namakachmoj na wječor korčmu połnu ludži, kotřiž so wšitcy serbscy rozmołwjachu.